



清·蕪益大師著

# 阿彌陀經要解

釋淨空敬題





清·蕩益大師著

# 阿彌陀經要解

釋淨空敬題






佛說阿彌陀經要解科判

一、釋迦牟尼佛說阿彌陀經  
二、敍譯人——姚秦三藏法師

### 三、解經文



佛說阿彌陀經

姚秦三藏法師鳩摩羅什譯

如是我聞。一時佛在舍衛國。祇樹給孤獨園。與大比丘僧。千二百五十人俱。皆是大阿羅漢。衆所知識。長老舍利弗。摩訶目犍連。摩訶迦葉。摩訶迦旃延。摩訶拘絺羅。離婆多。周利槃陀伽。難陀。阿難陀。摩訶睺羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菴樓駄。如是等諸大弟子。并諸

菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。及釋提桓因等無量諸天大衆俱。爾時佛告長老舍利弗。從是西方。過十萬億佛土。有世界名曰極樂。其土有佛。號阿彌陀。今現在說法。舍利弗。彼土何故名爲極樂。其國衆生。無有衆苦但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶。周帀圍繞。是故彼國名爲極樂。又舍利弗。極

樂國土有七寶池。八功德水。充滿其中。池底純以金  
沙布地。四邊階道。金。銀。琉璃。玻璃合成。上有  
樓閣。亦以金。銀。琉璃。玻璃。碑碣。赤珠。瑪瑙。  
而嚴飾之。池中蓮華。大如車輪。青色青光。黃色黃  
光。赤色赤光。白色白光。微妙香潔。舍利弗。極樂  
國土。成就如是功德莊嚴。又舍利弗。彼佛國土。常  
作天樂。黃金爲地。晝夜六時。雨天曼陀羅華。其土  
衆生。常以清旦。各以衣穢。盛衆妙華。供養他方十

萬億佛。即以食時。還到本國。飯食經行。舍利弗。  
極樂國土。成就如是功德莊嚴。復次舍利弗。彼國常  
有種種奇妙雜色之鳥。白鶴。孔雀。鸚鵡。舍利。迦  
陵頻伽。共命之鳥。是諸衆鳥。晝夜六時。出和雅音  
等法。其音演暢五根。五力。七菩提分。八聖道分。如是  
利弗。汝勿謂此鳥。實是罪報所生。所以者何。彼佛舍  
國土。無三惡道。舍利弗。其佛國土。尚無惡道之名。

何況有實。是諸衆鳥。皆是阿彌陀佛欲令法音宣流。  
變化所作。舍利弗。彼佛國土。微風吹動諸寶行樹。  
及寶羅網。出微妙音。譬如百千種樂同時俱作。聞  
是音者。自然皆生念佛念法念僧之心。舍利弗。其佛  
國土。成就如是功德莊嚴。舍利弗。於汝意云何。彼  
佛何故號阿彌陀。舍利弗。彼佛光明無量。照十方國  
無所障礙。是故號爲阿彌陀。又舍利弗。彼佛壽命  
及其人民。無量無邊阿僧祇劫。故名阿彌陀。舍利

弗。阿彌陀佛成佛已來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆。亦復如是。舍利弗。彼佛國土。成就如是功德莊嚴。又舍利弗。極樂國土。衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。舍利弗。衆生聞者。應當發願。願生彼國。所以者何。得與如是諸上善人。俱會一處。舍利弗。不可以少善根福德因緣。

• 得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖衆。現在其前。是人終時。心不顛倒。即得往生阿彌陀佛極樂國土。舍利弗。我見是利。故說此言。若有衆生聞是說者。應當發願。生彼國土。舍利弗。如我今者。讚歎阿彌陀佛不可思議功德之利。東方亦有阿閦佛。須彌相佛。大須彌佛。

須彌光佛。妙音佛。如是等恆河沙數諸佛。各於其國。出廣長舌相。偏覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。南方世界有日月燈佛。名聞光佛。大燄肩佛。須彌燈佛。無量精進佛。如是等恆河沙數諸佛。各於其國。出廣長舌相。偏覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。西方世界有無量壽佛。無量相佛。

無量幢佛。大光佛。大明佛。寶相佛。淨光佛。如是等恆河沙數諸佛。各於其國。出廣長舌相。偏覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。北方世界有燄肩佛。最勝音佛。難沮佛。日生佛。網明佛。如是等恆河沙數諸佛。各於其國。出廣長舌相。偏覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。下方世界有師子佛。

名聞佛・名光佛・達磨佛・法幢佛・持法佛・如是等  
恆河沙數諸佛。各於其國・出廣長舌相。徧覆三千大  
千世界・說誠實言。汝等衆生・當信是稱讚不可思議  
功德・一切諸佛所護念經。舍利弗。上方世界有梵音佛  
・宿王佛・香上佛・香光佛・大燄肩佛・雜色寶華嚴  
身佛・娑羅樹王佛・寶華德佛・見一切義佛・如須彌  
山佛・如是等恆河沙數諸佛。各於其國・出廣長舌相  
。徧覆三千大千世界・說誠實言。汝等衆生・當信是

稱讚不可思議功德。一切諸佛所護念經。舍利弗。於汝意云何。何故名爲一切諸佛所護念經。舍利弗。若有善男子善女人。聞是經受持者。及聞諸佛名者。是諸善男子善女人。皆爲一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及諸佛所說。舍利弗。若有人已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已生。若今。

生。若當生。是故舍利弗。諸善男子善女人。若有信者。應當發願。生彼國土。舍利弗。如我今者。稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛。能爲甚難希有之事。能於娑婆國土五濁惡世。劫濁見濁煩惱濁衆生濁命濁中。得阿耨多羅三藐三菩提。爲諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。

是爲甚難。佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

佛說阿彌陀經

拔一切業障根本。得生淨土陀羅尼。

南無阿彌多婆夜。哆他伽哆夜。哆地夜他。阿彌唎都婆毘。阿彌唎哆。悉耽婆毘。阿彌唎哆。毘迦蘭帝。阿彌唎哆。毘迦蘭哆。伽彌膩。伽伽那。枳多迦隸。

娑婆訶。



# 佛說阿彌陀經要解

姚秦三藏法師鳩摩羅什譯  
清西有沙門瀟益智旭解

原夫諸佛憫念群迷。隨機施化。雖歸元無二。而方便多門。  
○然於一切方便之中。求其至直捷至圓頓者。則莫若念佛  
求生淨土。又於一切念佛法門之中。求其至簡易至穩當者。  
○則莫若信願專持名號。是故淨土三經並行於世。而古人  
獨以阿彌陀經列爲日課。豈非有見於持名一法。普被三根。

。攝事理以無遺。統宗教而無外。尤爲不可思議也哉。古來註疏。代不乏人。世遠就湮。所存無幾。雲棲和尚著爲疏鈔。廣大精微。幽谿師伯述圓中鈔。高深洪博。蓋如日月中天。有目皆覩。特以文富義繁。邊涯莫測。或致初機淺識。信願難階。故復弗揣庸愚。再述要解。不敢與二翁競異。亦不必與二翁強同。譬如側看成峰。橫看成嶺。縱皆不盡廬山真境。要不失爲各各親見廬山而已。將釋經文。

。五重玄義。

第一釋名。此經以能說所說人爲名。佛者。此土能說之教  
主。即釋迦牟尼。乘大悲願力。生五濁惡世。以先覺覺後  
覺。無法不知。無法不見者也。說者。悅所懷也。佛以度  
生爲懷。衆生成佛機熟。爲說難信法。令究竟脫。故悅也。  
阿彌陀。所說彼土之導師。以四十八願。接信願念佛衆。  
生生極樂世界。永階不退者也。梵語阿彌陀。此云無量壽  
。亦云無量光。要之功德智慧。神通道力。依正莊嚴。說  
法化度。一一無量也。一切金口。通名爲經。對上五字。

是通別合爲題也。教行理三。各論通別。廣如台藏所明。  
第二辨體。大乘經皆以實相爲正體。吾人現前一念心性。  
不在內。不在外。不在中間。非過去。非現在。非未來。  
非青黃赤白。長短方圓。非香。非味。非觸。非法。覓之。  
了不可得。而不可言其無。具造百界千如。而不可言其有。  
離一切緣慮分別。語言文字相。而緣慮分別。語言文字。  
非離此別有自性。要之離一切相。即一切法。離故無相。  
即故無不相。不得已強名實相。實相之體。非寂非照。

而復寂而恆照。照而恆寂。照而寂。強名常寂光土。寂而照。強名清淨法身。又照寂強名法身。寂照強名報身。又性德寂照名法身。修德寂照名報身。又修德照寂名受用身。修德寂照名應化身。寂照不二。身土不二。性修不二。真應不二。無非實相。實相無二。亦無不二。是故舉體作依作正。作法作報。作自作他。乃至能說所說。能度所度。能信所信。能願所願。能持所持。能生所生。能讚所讚。無非實相正印之所印也。

第三明宗。宗是修行要徑。會體樞機。而萬行之綱領也。  
提綱則衆目張。挈領則襟袖至。故體後應須辨宗。此經以  
信願持名爲修行之宗要。非信不足啓願。非願不足導行。  
非持名妙行。不足滿所願而證所信。經中先陳依正以生信  
○次勸發願以導行。次示持名以徑登不退。信則信自。信  
他。信因。信果。信事。信理。願則厭離娑婆。欣求極樂  
○行則執持名號。一心不亂。信自者。信我現前一念之心  
○本非肉團。亦非緣影。豎無初後。橫絕邊涯。終日隨緣。

。終日不變。十方虛空微塵國土。元我一念心中所現物。  
我雖昏迷倒惑。苟一念回心。決定得生自心本具極樂。更  
無疑慮。是名信自。信他者。信釋迦如來決無誑語。彌陀  
世尊決無虛願。六方諸佛廣長舌決無二言。隨順諸佛真實  
教誨。決志求生。更無疑惑。是名信他。信因者。深信散  
亂稱名。猶爲成佛種子。況一心不亂。安得不生淨土。是  
名信因。信果者。深信淨土。諸善聚會。皆從念佛三昧得  
生。如種瓜得瓜。種豆得豆。亦如影必隨形。響必應聲。

決無虛棄。是名信果。信事者。深信只今現前一念不可盡故。依心所現十方世界亦不可盡。實有極樂國在十萬億土外。最極清淨莊嚴。不同莊生寓言。是名信事。信理者。深信十萬億土。實不出我今現前介爾。一念心外。以吾現前一念心性實無外故。又深信西方依正主伴。皆吾現前一念心中所現影。全事即理。全妄即真。全修即性。全他即自。我心徧故。佛心亦徧。一切衆生心性亦徧。譬如一室千燈。光互徧。重重交攝。不相妨礙。是名信理。如此信。

已。則娑婆即自心所感之穢。而自心穢。理應厭離。極樂即自心所感之淨。而自心淨。理應欣求。厭穢須捨至究竟。方無可捨。欣淨須取至究竟。方無可取。故妙宗云。取捨若極。與不取捨亦非異轍。設不從事取捨。但尚不取不捨。即是執理廢事。既廢於事。理亦不圓。若達全事即理。則取亦即理。捨亦即理。一取一捨。無非法界。故次信而明願也。言執持名號一心不亂者。名以召德。德不可思議。故名號亦不可思議。名號功德不可思議。故使散稱爲

佛種。執持登不退也。然諸經示淨土行。萬別千差。如觀像觀禮供養五悔六念等。一一行成。皆生淨土。唯持名一法。收機最廣。下手最易。故釋迦慈尊。無問自說。特向大智舍利弗拈出。可謂方便中第一方便。了義中無上了義。圓頓中最極圓頓。故云清珠投於濁水。濁水不得不乘真因。四種淨土。以爲一乘妙果。舉因則果必隨之。故以信願持名爲經正宗。其四種淨土之相。詳在妙宗鈔。及

梵網玄義。

茲不具述。俟後釋依正文中。

當略示耳。

第四明力用。

此經以往生不退爲力用。往生有四土。

各論

九品。且略明得生四土之相。

若執持名號。未斷見思。

隨其或散或定。

於同居土分三輩九品。

若持至事一心不亂。

見思任運先落。

則生方便有餘淨土。

若至理一心不亂。

豁破無明一品。

乃至四十一品。

則生實報莊嚴淨土。

亦分證常寂光土。

若無明斷盡。

寂光。二行不退。見思既落。塵沙亦破。生方便土。進趨極果。三位不退。帶業往生。在同居土。蓮華託質。永離退緣。四畢竟不退。不論至心散心。有心無心。或解不解。但彌陀名號。或六方佛名。此經名字。一經於耳。假使千萬劫後。畢竟因斯度脫。如聞塗毒鼓。遠近皆喪。食少金剛。決定不消也。復次祇帶業生同居淨。證位不退者。皆與補處俱。亦皆一生必補佛位。夫上善一處。是生同居。即已橫生上三土。一生補佛。是位不退。即已圓證三不。

退。如斯力用。乃千經萬論所未曾有。較彼頓悟正因。僅爲出塵階漸。生生不退。始可期於佛階者。不可同日語矣。


○宗教之士。如何勿思。

第五教相。此大乘菩薩藏攝。又是無問自說。徹底大慈之所加持。能令末法多障有情。依斯徑登不退。故當來經法滅盡。特留此經住世百年。廣度含識。阿伽陀藥。萬病總持。絕待圓融。不可思議。華嚴奧藏。法華祕髓。一切諸佛之心要。菩薩萬行之司南。皆不出於此矣。欲廣歎述。

窮劫莫盡。智者自當知之。

入文分三。初序分。二正宗分。三流通分。此三名初善中善後善。序如首。五官具存。正宗如身。臟腑無闕。流通如手足。運行不滯。故智者釋法華。初一品皆爲序。後十一品半皆爲流通。又一時迹本二門。各分三段。則法師等五品。皆爲迹門流通。蓋序必提一經之綱。流通則法施不壅。關係非小。後人不達。見經文稍涉義理。便判入正宗。致序及流通。僅存故套。安所稱初語亦

善。後語亦善也哉。



丙一、標法會時處

如是我聞。一時佛在舍衛國。祇樹給孤獨園。

如是。標信順。我聞。標師承。一時。標機感。佛。標教  
主。舍衛等。標說經處也。實相妙理。古今不變名如。依  
實相理。念佛求生淨土。決定無非曰是。實相非我非無我

。阿難不壞假名。故仍稱我。耳根發耳識。親聆圓音。如空印空名聞。時無實法。以師資道合。說聽周足。名一時。自覺。覺他。覺行圓滿。人天大師名佛。舍衛。此云聞物。中印度大國之名。波斯匿王所都也。匿王太子名祇陀。此云戰勝。匿王大臣名須達多。此云給孤獨。給孤長者布金買太子園。供佛及僧。祇陀感歎。施餘未布少地。故並名祇樹給孤獨園也。

丙二、引大衆同聞

丁一、聲聞衆

丁二、菩薩衆

丁三、天人衆

聲聞居首者。出世相故。常隨從故。佛法賴僧傳故。菩薩居中者。相不定故。不常隨故。表中道義故。天人列後者。世間相故。凡聖品雜故。外護職故。

丁一、聲聞衆

戊一、明類標數

戊二、表位歎德

戊三、列上首名

戊一、明類標數

與大比丘僧。千二百五十人俱。

大比丘。受具足戒出家人也。比丘梵語。含三義。一乞士

。一鉢資身。無所蓄藏。專求出要。二破惡。正慧觀察。

破煩惱惡。不墮愛見。三怖魔。發心受戒。羯磨成就。魔

即怖也。僧者。具云僧伽。此翻和合衆。同證無爲解脫。名理和。身同住。口無諍。意同悅。見同解。戒同修。利

均。名事和也。千二百五十人者。三迦葉師資共千人。

身子目連師資二百人。耶舍子等五十人。皆佛成道。先得度脫。感佛深恩。常隨從也。

戊二、表位歎德

皆是大阿羅漢。衆所知識。

阿羅漢亦含三義。一應供。即乞士果。二殺賊。即破惡果。三無生。即怖魔果。復有慧解脫。俱解脫。無疑解脫。三種不同。今は無疑解脫。故名大。又本是法身大士。示作聲聞。證此淨土不思議法。故名大也。從佛轉輪。廣利。

人天。故爲衆所知識。

戊三、列上首名

長老舍利弗。摩訶目犍連。摩訶迦葉。摩訶迦旃延。  
摩訶拘締羅。離婆多。周利槃陀伽。難陀。阿難陀。  
羅睺羅。憍梵波提。賓頭盧頗羅墮。迦留陀夷。摩訶。  
劫賓那。薄拘羅。阿菟樓駄。如是等諸大弟子。  
德臘俱尊。故名長老。身子尊者。聲聞衆中。智慧第一。  
連尊者。神通第一。飲光尊者。身有金光。傳佛心印爲初祖。

頭陀行第一。文飾尊者婆羅門種。論議第一。大膝尊者答  
問第一。星宿尊者無倒亂第一。繼道尊者因根鈍僅持一偈  
。辯才無盡。義持第一。喜尊者佛之親弟。儀容第一。慶  
喜尊者佛之堂弟。復爲侍者。多聞第一。覆障尊者佛之太  
子。密行第一。牛祠尊者宿世惡口。感此餘報。受天供養  
第一。不動尊者久住世間。應末世供。福田第一。黑光尊  
者爲佛使者。教化第一。房宿尊者知星宿第一。善容尊者  
壽命第一。無貧尊者亦佛堂弟。天眼第一。此等常隨衆。

本法身大士。示作聲聞。爲影響衆。今聞淨土攝受功德。得第一義悉檀之益。增道損生。自淨佛土。復名當機衆矣。

丁二、菩薩衆

并諸菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。  
菩薩摩訶薩。此云大道心成就有情。乃悲智雙運。自他兼利之稱。佛爲法王。文殊紹佛家業。名法王子。菩薩衆中。

。智慧第一。非勇猛實智。不能證解淨土法門。故居初。

彌勒當來成佛。現居等覺。以究竟嚴淨佛國爲要務。故次  
列。不休息者。曠劫修行不暫停故。常精進者。自利利他  
無疲倦故。此等深位菩薩。必皆求生淨土。以不離見佛。  
不離聞法。不離親近供養衆僧。乃能速疾圓滿菩提故。

丁三、天人衆

及釋提桓因等無量諸天大衆俱

釋提桓因。此云能爲主。即忉利天王。等者。下等四王。

上等夜摩。兜率。化樂。他化。色。無色。無量諸天也。  
大衆俱。謂十方天人八部修羅人非人等無不與會。無非淨  
土法門所攝之機也。通序竟。

乙二、別序（發起序）

淨土妙門。不可思議。無人能問。佛自唱依正名字爲發  
起。又佛智鑑機無謬。見此大衆應聞淨土妙門而獲四益  
。故不俟問。便自發起。如梵網下卷自唱位號云。我今  
盧舍那等。智者判作發起序。例可知也。

爾時佛告長老舍利弗。從是西方。過十萬億佛土。有世界名曰極樂。其土有佛。號阿彌陀。今現在說法。

淨土法門。三根普攝。絕待圓融。不可思議。圓收圓超。一切法門。甚深難信。故特告大智慧者。非第一智慧。不能直下無疑也。西方者。橫互直西。標示現處也。十萬億者。千萬曰億。今積億至十萬也。佛土者。三千大千世界。通爲一佛所化。且以此土言之。一須彌山。東西南北各一洲。同一日月所照。一鐵圍山所繞。名一四天下。千四天。

下名小千世界。千小千名中千世界。千中千名大千世界。  
過如此佛土十萬億之西。是極樂世界也。問。何故極樂在  
西方。答。此非善問。假使極樂在東。汝又問何故在東。  
豈非戲論。況自十一萬億佛土視之。又在東矣。何足致疑。  
。有世界名曰極樂。序依報國土之名也。暨約三際以辨時  
劫。橫約十方以定疆隅。故稱世界。極樂者。梵語須摩提  
。亦云安養。安樂。清泰等。乃永離衆苦第一安隱之謂。  
如下廣釋。然佛土有四。各分淨穢。凡聖同居土。五濁重

者穢。五濁輕者淨。方便有餘土。析空拙度證入者穢。體空巧度證入者淨。實報無障礙土。次第三觀證入者穢。一心三觀證入者淨。常寂光土。分證者穢。究竟滿證者淨。今云極樂世界。正指同居淨土。亦即橫具上三淨土也。有佛號阿彌陀。序正報教主之名也。翻譯如下廣釋。佛有三身。各論單複。法身單。指所證理性。報身單。指能證功德智慧。化身單。指所現相好色像。法身複者。自性清淨法身。離垢妙極法身。報身複者。自受用報身。他受用報法身。離垢妙極法身。報身複者。自受用報身。他受用報


身。化身複者。示生化身。應現化身。又佛界化身。隨類  
化身。雖辨單複三身。實非一非三。而三而一。不縱橫。  
不並別。離過絕非。不可思議。今云阿彌陀佛。正指同居  
土中示生化身。仍復即報即法也。復次世界及佛皆言有者  
。具四義。的標實境。令欣求故。誠語指示。令專一故。  
簡非乾城陽燄。非權現曲示。非緣影虛妄。非保真偏但。  
破魔邪權小故。圓彰性具。令深證故。今現在說法者。簡  
上依正二有。非過去已滅。未來未成。正應發願往生。親

觀聽法。速成正覺也。復次二有現在。勸信序也。世界名  
極樂。勸願序也。佛號阿彌陀。勸持名妙行序也。復次阿  
彌序佛。說法序法。現在海會序僧。佛法僧同一實相。序  
體。從此起信願行。序宗。信願行成。必得往生見佛聞法  
。序用。唯一佛界爲所緣境。不雜餘事。序教相也。言略  
意周矣。初序分竟。

甲二、正宗分

- 乙一、廣陳彼土依正妙果以啓信  
乙二、特勸衆生應求往生以發願  
乙三、正示行者執持名號以立行

信願持名。一經要旨。信願爲慧行。持名爲行行。得生與否。全由信願之有無。品位高下。全由持名之深淺。故慧行爲前導。行行爲正修。如目足並運也。



舍利弗。彼土何故名爲極樂。

○

戊二、釋

己一、約能受用釋

其國衆生。無有衆苦但受諸樂。故名極樂。

己一、約能受用釋

衆生是能受用人。等覺以還皆可名。今且約人民言。以下  
下例上也。娑婆苦樂雜。其實苦是苦苦。惧行心故。樂是  
壞苦。不久住故。非苦非樂是行苦。性遷流故。彼土永  
離三苦。不同此土對苦之樂。乃名極樂。一往分別。同居

五濁輕。無分段八苦。但受不病不老。自在遊行。天食天衣。諸善聚會等樂。方便體觀巧。無沈空滯寂之苦。但受遊戲神通等樂。實報心觀圓。無隔別不融之苦。但受無礙不思議樂。寂光究竟等。無法身滲漏。真常流注之苦。但受稱性圓滿究竟樂。然同居衆生。以持名善根福德同佛故。受圓淨四土。圓受諸樂也。復次極樂最勝。不在上三土。而在同居。良以上之。則十方同居。遜其殊特。下又可與此土較量。所以凡夫優入而從容。橫超而度越。佛說苦樂。

。意在於此。

己二、約所受用釋

又舍利弗。極樂國土。七重欄楯。七重羅網。七重行樹。皆是四寶。周市圍繞。是故彼國名爲極樂。

七重。表七科道品。四寶。表常樂我淨四德。周市圍繞者。佛菩薩等無量住處也。皆四寶則自功德深。周市繞則他賢聖徧。此極樂真因緣也。此等莊嚴。同居淨土是增上善業所感。亦圓五品觀所感。以緣生勝妙五塵爲體。方便淨

土是即空觀智所感。亦相似三觀所感。以妙真諦無漏五塵爲體。實報淨土是妙假觀智所感。亦分證三觀所感。以妙俗諦無盡五塵爲體。常寂光土是即中觀智所感。亦究竟三觀所感。以妙中諦稱性五塵爲體。欲令易解。作此分別。  
實四土莊嚴。無非因緣所生法。無不即空假中。所以極樂同居淨境。眞俗圓融。不可限量。下皆倣此。問。寂光惟理性。何得有此莊嚴。答。一一莊嚴全體理性。一一理性具足莊嚴。方是諸佛究竟依果。若寂光不具勝妙五塵。

一、異偏真法性。

戊一、別釋所受

己一、釋生處  
己二、結示佛力

丁二、廣釋

戊二、合釋能受所受

己一、釋生處

又舍利弗。極樂國土有七寶池。八功德水。充滿其中。  
○池底純以金沙布地。四邊階道。金銀琉璃玻璃磚甃赤珠瑪瑙而嚴飾。  
○上有樓閣。亦以金銀琉璃玻璃磚甃赤珠瑪瑙而嚴飾。  
○池中蓮華。大如車輪。青色青光。黃色黃光。赤

色赤光。白色白光。微妙香潔。

上明住處。今明生處。寶池金銀等所成。不同此方土石也。

。八功德者。一澄清。異此方渾濁。二清冷。異寒熱。三

甘美。異鹹淡劣味。四輕軟。異沈重。五潤澤。異澀腐褪。

色。六安和。異急暴。七除飢渴。異生冷。八長養諸根。

異損壞諸根。及滯戾增病沒溺等也。充滿其中。異枯竭汎

濫。底純金沙。異汙泥。階道四寶。異磚石。陞級名階。

坦途曰道。重屋爲樓。岑樓名閣。七寶樓閣。異此方土木。

丹青也。樓閣是住處。及法會處。但得寶池蓮胞開敷。便  
可登四岸。入法會。見佛聞法也。華輪者。輪王金輪大四  
十里。且舉最小者言。若據觀經及無量壽會。大小實不可  
量。由同居淨土身相不等故也。青色名優鉢羅。黃色名拘  
勿頭。赤色名鉢頭摩。白色名芬陀利。由生身有光。故蓮  
胞亦有光。然極樂蓮華。光色無量。此亦略言耳。微妙香  
潔。略歎蓮華四德。質而非形曰微。無礙曰妙。非形則非  
塵。故潔也。蓮胞如此。生身可知。

己二、結示佛力

舍利弗。極樂國土。成就如是功德莊嚴。

明上住處生處種種莊嚴。皆是阿彌陀佛大願大行稱性功德之所成就。故能徧嚴四種淨土。普攝十方三世一切凡聖令往生也。復次佛以大願作衆生多善根之因。以大行作衆生多福德之緣。令信願持名者。念念成就如是功德。而皆是已成。非今非當。此則以阿彌陀種種莊嚴作增上本質。帶起衆生自心種種莊嚴。全佛即生。全他即自。故曰成就如是。

功德莊嚴。

戊二、合釋能受所受

己一、約耳根聲塵明受用

庚一、正明  
庚二、結示

庚一、正明

又舍利弗。彼佛國土。常作天樂。黃金爲地。晝夜六時。雨天曼陀羅華。其土衆生。常以清旦。各以衣祫。方十萬億佛。即以食時。還到本國。飯食經行。

樂是聲塵。地是色塵。華是色香二塵。食是味塵。盛華散  
華經行是觸塵。衆生五根對五塵可知。常作者。即六時也。  
○黃金爲地者。七寶所嚴地界。體是黃金也。日分初中後  
○名晝三時。夜分初中後。名夜三時。故云晝夜六時。然  
彼土依正各有光明。不假日月。安分晝夜。且順此方假說  
分際耳。曼陀羅。此云適意。又云白華。衣祫。是盛華器  
○衆妙華。明非曼陀羅一種。應如妙經四華。表四因位。  
供養他方佛。表真因會趣極果。果德無不徧也。且據娑婆

言十萬億佛。意顯生極樂已。還供釋迦彌勒。皆不難耳。

若阿彌神力所加。何遠不到哉。食時。即清旦。故云即以

。明其神足不可思議。不離彼土。常徧十方。不假逾時回

還也。此文顯極樂一聲。一塵。一剎那。乃至跨步彈指。

悉與十方三寶貫徹無礙。又顯在娑婆則濁重惡障。與極樂

不隔而隔。生極樂則功德甚深。與娑婆隔而不隔也。飯食

經行者。念食食至。不假安排。食畢鉢去。不勞舉拭。但

經行金地。華樂娛樂。任運進修而已。

庚二、結示

舍利弗。極樂國土。成就如是功德莊嚴。

己二、約耳根聲塵明受用

以此方耳根最利。故別就法音廣明。其實極樂攝法界機。  
○五塵一一圓妙。出生一切法門也。

己二、約耳根聲塵明受用

庚一、別明

辛一、化有情聲

壬一、鳥音法利

辛二、化無情聲

壬二、微釋略顯

庚二、總結

壬一、鳥音法利

復次舍利弗。彼國常有種種奇妙雜色之鳥。白鶴。孔雀。鸚鵡。舍利。迦陵頻伽。共命之鳥。是諸衆鳥。晝夜六時。出和雅音。其音演暢五根。五力。七菩提分。八聖道分。如是等法。其土衆生。聞是音已。皆悉念佛念法念僧。

種種奇妙雜色。言多且美也。下略出六種。舍利。舊云鷲鷺。琦禪師云是春鷲。或然。迦陵頻伽。此云妙音。未出

穀時。音超衆鳥。共命。一身兩頭。識別報同。此二種西域雪山等處有之。皆寄此間愛賞者言其似而已。六時出音。則知淨土不以鳥棲爲夜。良以蓮華託生之身。本無昏睡。不假夜臥也。五根等者。三十七道品也。所謂四念處。一身念處。二受念處。三心念處。四法念處。四正勤。一已生惡法令斷。二未生惡法不令生。三未生善法令生。四已生善法令增長。四如意足。一欲如意足。二精進如意足。三心如意足。四思惟如意足。五根者。信正道及助道法。

名信根。

行正道及諸助道善法。勤求不息。名精進根。念

正道及諸助道善法。更無他念。名念根。攝心在正道及諸

助道善法中。相應不散。名定根。爲正道及諸助道善法。

觀於苦等四諦。名慧根。五力者。信根增長。能破疑惑。

破諸邪信。及破煩惱。名信力。精進根增長。破種種身心

懈怠。成辦出世大事。名精進力。念根增長。破諸邪念。

成就一切出世正念功德。名念力。定根增長。能破亂想。

發諸事理禪定。名定力。慧根增長。能遮通別諸惑。發真

無漏。名慧力。七菩提分。亦名七覺分。智慧觀諸法時。善能簡別真偽。不謬取諸虛偽法。名擇法覺分。精進修諸道法時。善能覺了。不謬行於無益苦行。常勤心在真法中。行。名精進覺分。若心得法喜。善能覺了此喜。不依顛倒之法而喜。住真法喜。名喜覺分。若斷除諸見煩惱之時。善能覺了。除諸虛偽。不損真正善根。名除覺分。若捨所見念著境時。善能覺了所捨之境虛偽不實。永不追憶。名捨覺分。若發諸禪定之時。善能覺了諸禪虛假。不生愛見。

妄想。名定覺分。若修出世道時。善能覺了。常使定慧均平。或心沈沒。當念用擇法精進。喜三覺分以察起之。或心浮動。當念用除捨定三覺分以攝持之。調和適中。名念覺分。八聖道分。亦名八正道分。修無漏行觀。見四諦分明。名正見。以無漏心相應思惟。動發覺知籌量。爲令增長入大涅槃。名正思惟。以無漏慧除四邪命。攝諸口業。住一切正語中。名正語。以無漏慧除身一切邪業。住清淨正身業中。名正業。以無漏慧通除三業中五種邪命。住清淨

正命中。名正命。以無漏慧相應勤精進修涅槃道。名正精進。以無漏慧相應念正道及助道法。名正念。以無漏慧相應入定。名正定。此等道品。依生滅四諦而修。即藏教道品。依無生四諦而修。即通教道品。依無量四諦而修。即別教道品。依無作四諦而修。即圓教道品。藏道品名半字法門。淨土濁輕。似不必用。爲小種先熟者或暫用之。通道品名大乘初門。三乘共稟。同居淨土多說之。別道品名獨菩薩法。同居方便淨土多說之。圓道品名無上佛法。有

利根者。於四淨土皆得聞也。如是等法者。等前念處正勤。  
如意足。等餘四攝六度十力無畏無量法門也。三十七品。  
收法雖盡。而機緣不等。作種種開合名義不同。隨所欲聞。  
無不演暢。故令聞者念三寶。發菩提心。伏滅煩惱也。  
灼見慈威不可思議。故念佛。法喜入心。法味充足。故念  
法。同聞共稟。一心修證。故念僧。能念即三觀。所念三  
寶。有別相。一體。及四教意義。三諦權實之不同。如上

壬二、徵釋略顯

舍利弗。汝勿謂此鳥。實是罪報所生。所以者何。彼佛國土。無三惡道。舍利弗。其佛國土。尚無惡道之名。何況有實。是諸衆鳥。皆是阿彌陀佛欲令法音宣流。變化所作。

徵釋可知。問。白鶴等非惡道名耶。答。既非罪報。則一  
一名字。皆詮如來究竟功德。所謂究竟白鶴等。無非性德  
美稱。豈惡名哉。問。化作衆鳥何義。答。有四悉檀因緣。

。凡情喜此諸鳥。順情而化。令歡喜故。鳥尚說法。令聞生善故。不於鳥起下劣想。對治分別心故。鳥即彌陀。令悟法身平等。無不具無不造故。此中顯微風樹網等音。及一切依正假實。當體即是阿彌陀佛三身四德。毫無差別也。

辛二、化無情聲

舍利弗。彼佛國土。微風吹動諸寶行樹。及寶羅網。出微妙音。譬如百千種樂同時俱作。聞是音者。自然。

皆生念佛念法念僧之心。

情與無情。同宣妙法。四教道品。無量法門。同時演說。  
隨類各解。能令聞者念三寶也。念三寶是從悉檀獲益。凡  
夫創聞。大踊徧身。是歡喜益。與三寶氣分交接。必能發  
菩提心。是生善益。由此伏滅煩惱。是破惡益。證悟一體。  
三寶。是入理益也。初別明竟。

庚二、總結

舍利弗。其佛國土。成就如是功德莊嚴。

重重結示。

令深信一切莊嚴。皆導師願行所成。種智所現。

○皆吾人淨業所感。唯識所變。

佛心生心。互爲影質。如

衆燈明。

各徧似一。全理成事。全事即理。全性起修。

全

修在性。亦可深長思矣。奈何離此淨土。

別譚唯心淨土。

甘墮鼠即鳥空之謂也哉。初依報妙竟。

丙二、正報妙

丁一、微釋名號

戊一、微

丁二、別釋主伴

戊二、釋

戊一、微

舍利弗。於汝意云何。彼佛何故號阿彌陀。

此經的示持名妙行。故特徵釋名號。欲人深信萬德洪名不可思議。一心執持。無復疑貳也。

戊二、釋

己一、約光明釋

己二、約壽命釋

阿彌陀。正翻無量。本不可說。本師以光壽二義。收盡一切無量。光則橫徧十方。壽則豎窮三際。橫豎交徹。即法界體。舉此體作彌陀身土。亦即舉此體作彌陀名號。是故

彌陀名號。即衆生本覺理性。持名。即始覺合本。始本不二。生佛不二。故一念相應一念佛。念念相應念念佛也。

己一、約光明釋

舍利弗。彼佛光明無量。照十方國。無所障礙。是故號爲阿彌陀。

心性寂而常照。故爲光明。今徹證心性無量之體。故光明無量也。諸佛皆徹性體。皆照十方。皆可名無量光。而因中願力不同。隨因緣立別名。彌陀爲法藏比丘。發四十八

願。有光明恆照十方之願。今果成如願也。法身光明無分  
際。報身光明稱真性。此則佛佛道同。應身光明有照一由  
旬者。十百千由旬者。一世界十百千世界者。唯阿彌普照  
。故別名無量光。然三身不一不異。爲令衆生得四益故。  
作此分別耳。當知無障礙。約人民言。由衆生與佛緣深。  
故佛光到處。一切世間無不圓見也。

己二、約壽命釋

又舍利弗。彼佛壽命。及其人民。無量無邊阿僧祇劫。

○故名阿彌陀。

心性照而常寂。故爲壽命。今徹證心性無量之體。故壽命無量也。法身壽命無始無終。報身壽命有始無終。此亦佛道同。皆可名無量壽。應身隨願隨機。延促不等。法藏願王。有佛及人壽命皆無量之願。今果成如願。別名無量壽也。阿僧祇。無邊。無量。皆算數名。實有量之無量。然三身不一不異。應身亦可即是無量之無量矣。及者。併也。人民。指等覺以還。謂佛壽命併其人民壽命。皆無量。

等也。當知光壽名號。皆本衆生建立。以生佛平等。能令持名者。光明壽命同佛無異也。復次由無量光義。故衆生生極樂即生十方。見阿彌陀佛即見十方諸佛。能自度即普利一切。由無量壽義。故極樂人民。即是一生補處。皆定此生成佛。不至異生。當知離卻現前一念無量光壽之心。何處有阿彌陀佛名號。而離卻阿彌陀佛名號。何由徹證現前一念無量光壽之心。願深思之。願深思之。

己一、主

戊一、別釋

丁二、別釋主伴

戊二、結示

己二、伴

己一、主（此亦釋別序中今現在說法句）

舍利弗。阿彌陀佛成佛以來。於今十劫。

此明極樂世界教主成就也。然法身無成無不成。不應論劫。  
○報身因圓果滿名成。應身爲物示生名成。皆可論劫。又  
法身因修德顯。亦可論成論劫。報身別無新得。應身如月  
印川。亦無成不成。不應論劫。但諸佛成道。各有本迹。

本地並不可測。且約極樂示成之迹而言。即是三身一成一切成。亦是非成非不成而論成也。又佛壽無量。今僅十劫。則現在說法。時正未央。普勸三世衆生速求往生。同佛壽命。一生成辦也。又下文無數聲聞菩薩及與補處。皆十劫所成就。正顯十方三世往生不退者。多且易也。

己二、伴

又舍利弗。彼佛有無量無邊聲聞弟子。皆阿羅漢。○非是算數之所能知。諸菩薩衆。亦復如是。

他方定性二乘。不得生彼。若先習小行。臨終迴向菩提。  
發大誓願者。生彼國已。佛順機說法。令斷見思。故名羅  
漢。如別教七住斷見思之類。非實聲聞也。蓋藏通二教。  
不聞他方佛名。今聞彌陀名號。信願往生。總屬別圓二教。  
所攝機矣。

戊二、結示

舍利弗。彼佛國土。成就如是功德莊嚴。  
佛及聲聞菩薩。並是彌陀因中願行所成。亦是果上一成一

切成。是則佛菩薩聲聞。各各非自非他。自他不二。故云成就如是功德莊嚴。能令信願持名者。念念亦如是成就也。初廣陳彼土依正妙果以啓信竟。

乙二、特勸衆生應求往生以發願

丙一、揭示無上因緣

丙二、特勸淨土殊勝

淨土殊勝。謂帶業往生。橫出三界。同居橫具四土。開顯四教法輪。衆生圓淨四土。圓見三身。圓證三不退。人民皆一生成佛。如是等勝異超絕。全在此二科點示。

須諦研之。

丙一、揭示無上因緣

又舍利弗。極樂國土。衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。

阿鞞跋致。此云不退。一位不退。入聖流。不墮凡地。二行不退。恆度生。不墮二乘地。三念不退。心心流入薩婆若海。若約此土藏初果。通見地。別初住。圓初信。名位。

不退。通菩薩。別十向。圓十信。名行不退。別初地。圓初住。名念不退。今淨土五逆十念成就帶業往生居下品者。皆得三不退。然據教道。若是凡夫。則非初果等。若是二乘。則非菩薩等。若是異生。則非同生性等。又念不退。非復異生。行不退。非僅見道。位不退。非是人民。蹟等則成大妄。進步則捨故稱。唯極樂同居。一切俱非。一切俱是。十方佛土無此名相。無此階位。無此法門。非心性之極致。持名之奇勳。彌陀之大願。何以有此。

一、一生補處者。只一生補佛位。如彌勒觀音等。極樂人民普  
皆一生成佛。人人必實證補處。故其中多有此等上善。不  
可數知也。復次釋迦一代時教。惟華嚴明一生圓滿。而一  
生圓滿之因。則末後普賢行願品中。十大願王導歸安養。  
且以此勸進華藏海衆。嗟乎。凡夫例登補處。奇倡極談。  
不可測度。華嚴所稟。卻在此經。而天下古今。信渺疑多。  
。辭繁義蝕。余唯有剖心瀝血而已。

丙二、特勸淨土殊勝

舍利弗。衆生聞者。應當發願。願生彼國。所以者何。  
○得與如是諸上善人。俱會一處。

前羅漢菩薩。但可云善人。唯補處居因位之極。故云上。

其數甚多。故云諸。俱會一處。猶言凡聖同居。尋常由實

聖過去有漏業。權聖大慈悲願。故凡夫得與聖人同居。至

實聖灰身。權聖機盡。便升沈碩異。苦樂懸殊。乃暫同。

非究竟同也。又天壤之間。見聞者少。幸獲見聞。親近步

趨者少。又佛世聖人縱多。如珍如瑞。不能徧滿國土。如

衆星微塵。又居雖同。而所作所辦。則迥不同。今同以無  
漏不思議業。感生俱會一處。爲師友。如壇如簾。同盡無  
明。同登妙覺。是則下凡衆生於念不退中。超盡四十一因  
位。若謂是凡夫。卻不歷異生。必補佛職。與觀音勢至無  
別。若謂是一生補處。卻可名凡夫。不可名等覺菩薩。此  
皆教網所不能收。刹網所不能例。當知吾人大事因緣。同  
居一關。最難透脫。唯極樂同居。超出十方同居之外。了  
此。方能深信彌陀願力。信佛力。方能深信名號功德。信

持名。方能深信吾人心性本不可思議也。具此深信。方能發於大願。文中應當二字。即指深信。深信發願。即無上菩提。合此信願。的爲淨土指南。由此而執持名號。乃爲正行。若信願堅固。臨終十念一念。亦決得生。若無信願。縱將名號持至風吹不入。雨打不溼。如銀牆鐵壁相似。亦無得生之理。修淨業者。不可不知也。大本阿彌陀經。亦以發菩提願爲要。正與此同。

乙三、正示行者執持名號以立行

丙一、正示無上因果

丙二、重勸

丙一、正示無上因果

舍利弗。不可以少善根福德因緣。得生彼國。舍利弗。  
若有善男子。善女人。聞說阿彌陀佛。執持名號。  
若一日。若二日。若三日。若四日。若五日。若六日。  
若七日。一心不亂。其人臨命終時。阿彌陀佛與諸  
聖衆。現在其前。是人終時。心不顛倒。即得往生阿  
彌陀佛極樂國土。

菩提正道名善根。即親因。種種助道施戒禪等名福德。即助緣。聲聞緣覺菩提善根少。人天有漏福業福德少。皆不可生淨土。唯以信願執持名號。則一一聲悉具多善根福德。○散心稱名。福善亦不可量。況一心不亂哉。故使感應道交。文成印壞。彌陀聖衆。不來而來。親垂接引。行人心識。不往而往。託質寶蓮也。善男女者。不論出家在家。貴賤老少。六趣四生。但聞佛名。即多劫善根成熟。五逆十惡皆名善也。阿彌陀佛是萬德洪名。以名召德。罄無不

盡。故即以執持名號爲正行。不必更涉觀想參究等行。至  
簡易。至直捷也。聞而信。信而願。乃肯執持。不信不願。  
與不聞等。雖爲遠因。不名聞慧。執持則念念憶佛名號。  
故是思慧。然有事持理持。事持者。信有西方阿彌陀佛。  
而未達是心作佛。是心是佛。但以決志願求生故。如子  
憶母。無時暫忘。理持者。信西方阿彌陀佛。是我心具。  
是我心造。即以自心所具所造洪名。爲繫心之境。令不暫  
忘也。一日至七日者。剋期辦事也。利根一日即不亂。鈍

根七日方不亂。中根二三四五六日不定。又利根能七日不亂。鈍根僅一日不亂。中根六五四三二日不定。一心亦二種。不論事持理持。持至伏除煩惱。乃至見思先盡。皆事一心。不論事持理持。持至心開見本性佛。皆理一心。事一心不爲見思所亂。理一心不爲二邊所亂。即修慧也。不爲見思亂。故感變化身佛及諸聖衆現前。心不復起娑婆界中三有顛倒。往生同居方便二種極樂世界。不爲二邊亂。故感受用身佛及諸聖衆現前。心不復起生死涅槃二見顛倒。

。往生實報寂光二種極樂世界。當知執持名號。既簡易直捷。乃至頓至圓。以念念即佛故。不勞觀想。不必參究。當下圓明。無餘無欠。上上根不能踰其間。下下根亦能臻其域。其所感佛。所生土。往往勝進。亦不一概。可謂橫該八教。豎徹五時。所以徹底悲心。無問自說。且深歎其難信也。問。觀經專明作觀。何謂不勞觀想。答。此義即出觀經。彼經因勝觀非凡夫心力所及。故於第十三別開劣像之觀。而障重者猶不能念彼佛。故於第十六大開稱名之。

門。今經因末世障重者多。故專主第十六觀。當知人根雖  
鈍。而丈六八尺之像身。無量壽佛之名字。未嘗不心作心  
是。故觀劣者不勞勝觀。而稱名者並不勞觀想也。問。天  
奇毒峰諸祖。皆主參念佛者是誰。何謂不必參究。答。此  
義即出天奇諸祖。前祖因念佛人不契釋迦徹底悲心。故傍  
不甘。直下詰問。一猛提醒。何止長夜復旦。我輩至今日  
。猶不肯死心念佛。苦欲執敲門瓦子。向屋裡打親生爺娘  
。則於諸祖成惡逆。非善順也。進問。此在肯心者則可。

未肯者何得相應。曰。噫。正唯未肯。所以要你肯心相應。  
○汝等正信未開。如生牛皮。不可屈折。當知有目者。固  
無日下然燈之理。而無目者。亦何必於日中苦覓燈炬。大  
勢至法王子云。不假方便。自得心開。此一行三昧中大火  
聚語也。敢有觸者。寧不被燒。問。臨終佛現。寧保非魔  
○答。修心人不作佛觀。而佛忽現。非本所期。故名魔事  
○念佛見佛。已是相應。況臨終非致魔時。何須疑慮。問  
○七日不亂。平時耶。臨終耶。答。平時也。問。七日不

亂之後。復起惑造業。亦得生耶。答。果得一心不亂之人。  
○無更起惑造業之事。問。大本十念。寶王一念。平時耶。  
○臨終耶。答。十念通二時。晨朝十念屬平時。十念得生。  
○與觀經十念稱名同。屬臨終時。一念則但約臨終時。問。  
○十念一念並得生。何須七日。答。若無平時七日功夫。  
安有臨終十念一念。縱下下品逆惡之人。並是夙因成熟。  
故感臨終遇善友。聞便信願。此事萬中無一。豈可僥倖。  
淨土或問斥此最詳。今人不可不讀。問。西方去此十萬億

土。何得即生。答。十萬億土。不出我現前一念心性之外。  
○以心性本無外故。又仗自心之佛力接引。何難即生。如  
鏡中照數十層山水樓閣。層數宛然。實無遠近。一照俱了。  
○見無先後。從是西方過十萬億佛土。有世界名曰極樂亦  
如是。其土有佛號阿彌陀。今現在說法亦如是。其人臨命  
終時。阿彌陀佛與諸聖衆現在其前。是人終時心不顛倒。  
即得往生阿彌陀佛極樂國土亦如是。當知字字皆海印三昧  
○大圓鏡智之靈文也。問。持名判行。則是助行。何名

正行。答。依一心說信願行。非先後。非定三。蓋無願行  
不名真信。無行信不名真願。無信願不名真行。今全由信  
願持名。故信願行三。聲聲圓具。所以名多善根福德因緣  
。觀經稱佛名故。念念中除八十億劫生死之罪。此之謂也  
。若福善不多。安能除罪如此之大。問。臨終猛切。能除  
多罪。平日至心稱名。亦除罪否。答。如日出。群闇消。  
稱洪名。萬罪滅。問。散心稱名。亦除罪否。答。名號功  
德不可思議。寧不除罪。但不定往生。以悠悠散善。難敵。

無始積罪故。當知積罪假使有體相者。盡虛空界不能容受。  
。雖百年晝夜彌陀十萬。一一聲滅八十億劫生死。然所滅  
罪如爪上土。未滅罪如大地土。唯念至一心不亂。則如健  
人突圍而出。非復三軍能制耳。然稱名便爲成佛種子。如  
金剛終不可壞。佛世一老人求出家。五百聖衆皆謂無善根  
。佛言。此人無量劫前爲虎傭。失聲稱南無佛。今此善根  
成熟。值我得道。非二乘道眼所知也。由此觀之。法華明  
過去佛所。散亂稱名。皆已成佛。豈不信哉。伏願繙素智

愚。於此簡易直捷無上圓頓法門。勿視爲難而輒生退諉。  
勿視爲易而漫不策勤。勿視爲淺而妄致藐輕。勿視爲深而  
弗敢承任。蓋所持之名號。真實不可思議。能持之心性。  
亦真實不可思議。持一聲。則一聲不可思議。持十百千萬  
無量無數聲。聲聲皆不可思議也。

丙二、重勸

舍利弗。我見是利。故說此言。若有衆生聞是說者。  
應當發願。生彼國土。

我見者。佛眼所見究竟盡明了也。是利者。橫出五濁。圓淨  
四土。直至不退位盡。是爲不可思議功德之利也。復次是  
利。約命終時心不顛倒而言。蓋穢土自力修行。生死關頭  
最難得力。無論頑修狂慧。懶懶無功。即悟門深遠。操  
履潛確之人。儻分毫習氣未除。未免隨強偏墮。永明祖師  
所謂十人九蹉路。陰境若現前。瞥爾隨他去。此誠可寒心  
者也。初果昧於出胎。菩薩昏於隔陰。者裡豈容強作主宰  
。僥倖顛預。唯有信願持名。仗他力故。佛慈悲願。定不


唐捐。彌陀聖衆。現前慰導。故得無倒。自在往生。佛見衆生臨終倒亂之苦。特爲保任此事。所以殷勤再勸發願。以願能導行故也。問。佛既心作心是。何不竟言自佛。而必以他佛爲勝。何也。答。此之法門。全在了他即自。若諱言他佛。則是他見未忘。若偏重自佛。卻成我見顛倒。又悉檀四益。後三益事不孤起。儻不從世界深發慶信。則欣厭二益尚不能生。何況悟入理佛。唯即事持達理持。所以彌陀聖衆現前。即是本性明顯。往生彼土。見佛聞法。

即是成就慧身。不由他悟。法門深妙。破盡一切戲論。斬盡一切意見。唯馬鳴龍樹智者永明之流。徹底擔荷得去。其餘世智辯聰。通儒禪客。盡思度量愈推愈遠。又不若愚夫婦老實念佛者。爲能潛通佛智。暗合道妙也。我見是利。故說此言。分明以佛眼佛音。印定此事。豈敢違抗。不善順入也哉。二正宗分竟。

甲三、流通分

信願持名一法。圓收圓超。一切法門。豎與一切法門渾同。

。橫與一切法門迥異。既無問自說。誰堪倡募流通。唯  
佛與佛。乃能究盡諸法實相。此經唯佛境界。唯佛佛可  
與流通耳。



舍利弗。如我今者。讚歎阿彌陀佛不可思議功德之利。東方亦有阿閦鞞佛。須彌相佛。大須彌佛。須彌光佛。妙音佛。如是等恆河沙數諸佛。各於其國。出廣長舌相。偏覆三千大千世界。說誠實言。汝等衆生。當信是稱讚不可思議功德一切諸佛所護念經。

不可思議。略有五意。一。橫超三界。不俟斷惑。二。即西方橫具四土。非由漸證。三。但持名號。不假禪觀諸方便。四。一七爲期。不藉多劫多生多年月。五。持一佛名

。即爲諸佛護念。不異持一切佛名。此皆導師大願行之所成就。故曰阿彌陀佛不可思議功德之利。又行人信願持名。全攝佛功德。成自功德。故亦曰阿彌陀佛不可思議功德之利。下又曰諸佛不可思議功德。我不可思議功德。是諸佛釋迦。皆以阿彌爲自也。阿閦軀。此云無動。佛有無量德。應有無量名。隨機而立。或取因。或取果。或性。或相。或行願等。雖舉一隅。仍具四悉。隨一一名。顯所詮德。劫壽說之。不能悉也。東方虛空不可盡。世界亦不可

盡。世界不可盡。住世諸佛亦不可盡。略舉恆河沙耳。此等諸佛。各出廣長舌勸信此經。而衆生猶不生信。頑冥極矣。常人三世不妄語。舌能至鼻。藏果頭佛。三大僧祇劫不妄語。舌薄廣長可覆面。今證大乘淨土妙門。所以偏覆三千。表理誠稱真。事實非謬也。標出經題。流通之本。什師順此方好略。譯今題。巧合持名妙行。奘師譯云稱讚淨土佛攝受經。文有詳略。義無增減。

戊二、南方

舍利弗。南方世界有日月燈佛。名聞光佛。大燄肩佛。  
須彌燈佛。無量精進佛。如是等恆河沙數諸佛。各  
於其國。出廣長舌相。徧覆三千大千世界。說誠實言。  
汝等衆生。當信是稱讚不可思議功德。一切諸佛所護。  
念經。

戊三、西方

舍利弗。西方世界有無量壽佛。無量相佛。無量幢佛。  
大光佛。大明佛。寶相佛。淨光佛。如是等恆河沙。

數諸佛。各於其國。出廣長舌相。徧覆三千大千世界。  
說誠實言。汝等衆生。當信是稱讚不可思議功德一  
切諸佛所護念經。

無量壽佛。與彌陀同名。十方各方面同名諸佛無量也。然  
即是導師亦可。爲度衆生。不妨轉讚釋迦如來所說。

戊四、北方

舍利弗。北方世界有燄肩佛。最勝音佛。難沮佛。  
日生佛。網明佛。如是等恆河沙數諸佛。各於其國。  
出

廣長舌相。偏覆三千大千世界。說誠實言。汝等衆生。  
○當信是稱讚不可思議功德。一切諸佛所護念經。

戊五、下方

舍利弗。下方世界有師子佛。名聞佛。名光佛。達磨  
佛。法幢佛。持法佛。如是等恆河沙數諸佛。各於其  
國。出廣長舌相。偏覆三千大千世界。說誠實言。汝等衆生。  
○當信是稱讚不可思議功德。一切諸佛所護念經。

此界水輪金輪風輪之下。復有下界非非想天等。乃至重重無盡也。達磨。此云法。

戊六、上方

舍利弗。上方世界有梵音佛。宿王佛。香上佛。香光  
佛。大燄肩佛。雜色寶華嚴身佛。娑羅樹王佛。寶華  
德佛。見一切義佛。如須彌山佛。如是等恆河沙數諸  
佛。各於其國。出廣長舌相。徧覆三千大千世界。說  
誠實言。汝等衆生。當信是稱讚不可思議功德。一切諸

佛所護念經。

此界非非想天之上。復有上界風輪金輪及三界等。重重無盡也。問。諸方必有淨土。何偏讚西方。答。此亦非善問。假使讚阿閦佛國。汝又疑偏東方。展轉戲論。問。何不偏緣法界。答。有三義。令初機易標心故。阿彌本願勝故。佛與此土衆生偏有緣故。蓋佛度生。生受化。其間難易淺深。總在緣。緣之所在。恩德弘深。種種教啓。能令歡喜信入。能令觸動宿種。能令魔障難遮。能令體性開發。

。諸佛本從法身垂迹。固結緣種。若世出世。悉不可思議。  
。尊隆於教乘。舉揚於海會。沁入於苦海。慈契於寂光。  
所以萬德欽承。群靈拱極。當知佛種從緣起。緣即法界。  
一念一切念。一生一切生。一香一華。一聲一色。乃至受  
懺授記。摩頂垂手。十方三世。莫不偏融。故此增上緣因。  
。名法界緣起。此正所謂偏緣法界者也。淺位人便可決志。  
專求。深位人亦不必捨西方而別求華藏。若謂西方是權。  
華藏是實。西方小。華藏大者。全墮衆生偏計執情。以不

達權實一體。大小無性故也。

丁二、微釋經題

舍利弗。於汝意云何。何故名爲一切諸佛所護念經。  
舍利弗。若有善男子善女人。聞是經受持者。及聞諸  
佛名者。是諸善男子善女人。皆爲一切諸佛之所護念。  
○。皆得不退轉於阿耨多羅三藐三菩提。是故舍利弗。  
汝等皆當信受我語。及諸佛所說。

此經獨詮無上心要。諸佛名字。並詮無上圓滿究竟萬德。

故聞者皆爲諸佛護念。又聞經受持。即執持名號。阿彌陀  
號。諸佛所護念故。問。但聞諸佛名。而未持經。亦得護  
念不退耶。答。此義有局有通。占察謂雜亂垢心。雖誦我  
名而不爲聞。以不能生決定信解。但獲世間善報。不得廣  
大深妙利益。若到一行三昧。則成廣大微妙行心。名得相  
似無生法忍。乃爲得聞十方佛名。此亦應爾。故須聞已執  
持至一心不亂。方爲聞諸佛名。蒙諸佛護念。此局義也。  
通義者。諸佛慈悲。不可思議。名號功德。亦不可思議。

故一聞佛名。不論有心無心。若信若否。皆成緣種。況佛  
度衆生。不簡怨親。恆無疲倦。苟聞佛名。佛必護念。又  
何疑焉。然據金剛三論。根熟菩薩爲佛護念。位在別地圓  
住。蓋約自力。必入同生性乃可護念。今仗他力。故相似  
位即蒙護念。乃至相似位以還。亦皆有通護念之義。下至  
一聞佛名。於同體法性有資發力。亦得遠因終不退也。阿  
耨多羅。此云無上。三藐三菩提。此云正等正覺。即大乘  
果覺也。圓三不退。乃一生成佛異名。故勸身子等皆當信

受。聞名功德如此。釋迦及十方諸佛同所宣說。可不信乎。

○初勸信流通竟。

丙二、勸願流通

舍利弗。若有人已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子善女人。若有信者。應當發願。生彼國土。

已願已生。今願今生。當願當生。正顯依信所發之願無虛也。非信不能發願。非願信亦不生。故云若有信者。應當發願。又願者。信之券。行之樞。尤爲要務。舉願則信行。在其中。所以殷勤三勸也。復次願生彼國。即欣厭二門。厭離娑婆。與依苦集二諦所發二種弘誓相應。欣求極樂。與依道滅二諦所發二種弘誓相應。故得不退轉於大菩提道。問。今發願但可云當生。何名今生。答。此亦二義。一約一期名今。現生發願持名。臨終定生淨土。二約剎那名。

今。一念相應。一念生。念念相應。念念生。妙因妙果。不離一心。如秤兩頭。低昂時等。何俟婆婆報盡。方育珍池。

只今信願持名。蓮萼光榮。金臺影現。便非婆婆界內人矣。極圓極頓。難議難思。唯有大智。方能諦信。

丙三、勸行流通

丁一、諸佛轉讚

丁二、教主結歎

丁一、諸佛轉讚

舍利弗。如我今者。稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛。

。能爲甚難希有之事。能於娑婆國土五濁惡世。劫濁見濁煩惱濁衆生濁命濁中。得阿耨多羅三藐三菩提。爲諸衆生。說是一切世間難信之法。

諸佛功德智慧。雖皆平等。而施化則有難易。淨土成菩提易。濁世難。爲淨土衆生說法易。爲濁世衆生難。爲濁世衆生說漸法猶易。說頓法難。爲濁世衆生說餘頓法猶易。說淨土橫超頓法尤難。爲濁世衆生說淨土橫超頓修頓證妙觀。已自不易。說此無藉劬勞修證。但持名號。徑登不退。

。奇特勝妙超出思議第一方便。更爲難中之難。故十方諸佛。無不推我釋迦偏爲勇猛也。劫濁者。濁法聚會之時。劫濁中。非帶業橫出之行。必不能度。見濁者。五利使。邪見增盛。謂身見。邊見。見取。戒取及諸邪見。昏昧汨沒。故名爲濁。見濁中。非不假方便之行。必不能度。煩惱濁者。五鈍使。煩惑增盛。謂貪。瞋。癡。慢。疑。煩惱濁亂。故名爲濁。煩惱濁中。非即凡心是佛心之行。必不能度。衆生濁者。見煩惱所感麤弊五陰和合。假名衆生。

。色心並皆陋劣。故名爲濁。衆生濁中。非欣厭之行。必不能度。命濁者。因果並劣。壽命短促。乃至不滿百歲。故名爲濁。命濁中。非不費時劫。不勞勤苦之行。必不能度。復次祇此信願。莊嚴一聲阿彌陀佛。轉劫濁爲清淨海會。轉見濁爲無量光。轉煩惱濁爲常寂光。轉衆生濁爲蓮華化生。轉命濁爲無量壽。故一聲阿彌陀佛。即釋迦本師於五濁惡世。所得之阿耨多羅三藐三菩提法。今以此果覺全體授與濁惡衆生。乃諸佛所行境界。唯佛與佛能究竟盡。

非九界自力所能信解也。諸衆生。別指五濁惡人。一切世間。通指四土器世間。九界有情世間也。

丁二、教主結歎

前勸信流通。是諸佛付囑。此本師付囑。囑語略別從通。但云一切世間。猶前諸佛所云汝等衆生。當知文殊迦葉等。皆在所囑也。

舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。

信願持名一行。不涉施爲。圓轉五濁。唯信乃入。非思議所行境界。設非本師來入惡世。示得菩提。以大智大悲。見此行此說此。衆生何由稟此也哉。然吾人處劫濁中。決定爲時所圍。爲苦所逼。處見濁中。決定爲邪智所纏。邪師所惑。處煩惱濁中。決定爲貪欲所陷。惡業所蟄。處衆生濁中。決定安於臭穢而不能洞覺。甘於劣弱而不能奮飛。處命濁中。決定爲無常所吞。石火電光。措手不及。若不深知其甚難。將謂更有別法可出五濁。烽燧宅裡。戲論。

紛然。唯深知其甚難。方肯死盡偷心。寶此一行。此本師所以極口說其難甚。而深囑我等當知也。初普勸竟。

乙二、結勸

佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

法門不可思議。難信難知。無一人能發問者。佛智鑑機。知衆生成佛緣熟。無問自說。令得四益。如時雨化。故歡喜信受也。身心怡悅。名歡喜。毫無疑惑。名信。領納不忘。名

受。感大恩德。投身歸命。名作禮。依教修持。一往不退。  
佛說阿彌陀經要解。名而去。

萬益大師跋

經云。末法億億人修行。罕一得道。唯依念佛得度。嗚呼。  
○今正是其時矣。捨此不思議法門。其何能淑。旭出家時  
○宗乘自負。藐視教典。妄謂持名。曲爲中下。後因大病  
○發意西歸。復研妙宗圓中二鈔。及雲棲疏鈔等書。始知  
念佛三昧。實無上寶王。方肯死心執持名號。萬牛莫挽也。  
○吾友去病。久事淨業。欲令此經大旨。辭不繁而炳著。  
請余爲述要解。余欲普與法界有情同生極樂。理不可卻。

舉筆於丁亥九月二十有七。脫稿於十月初五。凡九日告成。  
○所願一句一字。咸作資糧。一見一聞。同階不退。信疑  
皆植道種。讚謗等歸解脫。仰唯諸佛菩薩攝受證明。同學  
友人隨喜加被。西有道人萬益智旭閣筆故跋。時年四十有  
九。

## 精要十念法

謹提議以淨空法師宣說之簡要必生十念法，為淨宗學人今後之一般自修與共修之常規。茲說明於後：

自修者，日中九次念十聲佛號，亦即晨起與睡前各一次，日中三餐各一次，午前開工及收工各一次，午後開工及收工各一次，共計九次。每次稱念十聲四字或六字彌陀名號，而原有之日常定課可照常行之。

共修者，凡講經、開會、聚餐等無特定儀軌之集會，在共同行事之始，行此十念法。亦即約同大眾合掌，同聲稱念十聲「南無阿彌陀佛」，而後始進行講經、開會、用餐等活動事宜。

按此自修與共修之十念法，有其特殊之法益。試舉如下：

此法簡單易行，用時少而收效宏，確實切要，可久可廣。

為「佛化家庭」之具體有效方法。例如：於家庭中三餐時行之，則舉家之成員或信或不信皆蒙攝持不遺。此法有佛化親朋鄰里、普及社會之大利益。

以簡單易行，一日九次，從早到晚，佛氣不斷。一日生活之中，佛念相繼，日復一日。久能如斯，則行人之氣質心性將逐漸清淨，信心與法樂生焉，福大莫能窮。

如能隨順親和，稱念十聲佛號，便有祛除雜染、澄淨心念、凝聚心神、專心務道，以及所辦易成、所遇吉祥、蒙佛加佑不可思議等等之功德。

自修與共修，相資相融，資糧集聚，個人之往生在握，而共同之菩提大業，亦共成焉。

此法可以二法名之。試姑名之。

一為「淨業加行十念法」，是對已有定課者言，因此法是在原有之課業上加行之故。

一為「簡要必生十念法」，是指適於無定課者言，因現今社會遞變，匆忙無暇，局礙多難故。此法易集資糧，信願行之，平易圓具，而「都攝六根，淨念相繼」之標準，亦甚符合無缺。

因每次念佛時間短，易攝心及不懈怠故，又以九次念佛之功行，均衡分布貫穿於全日，全日之身心，不得不佛，亦即全日生活念佛化，念佛生活化。

總而言之，此法簡要輕鬆，毫無滯難之苦，如此法大行，則淨業學人幸甚！未來眾生幸甚！諸佛歡喜。

南無阿彌陀佛！

一九九四年諸佛歡喜日美國淨宗學會四眾同倫敬勸





### 華藏淨宗學會

本會一切法寶，免費結緣，禁止販售，請勿擅改內容，歡迎翻印流通。

All the Dharma material in this association is for free distribution. Please don't sell it nor alter any content without authorization. Any reproduction or circulation is appreciated.